

四庫全書

集部

欽定四庫全書

御定全唐詩卷八百八十七

盧言

一作顏
詩一首

上安祿山

祿山入洛陽大雪盈尺言上詩

象曰雲雷屯大君理經綸馬上取天下雪中朝海神

裴諤

字士明聞喜人擢明經累官至兵部侍郎河南尹詩一首

儲潭廟

大歷三年戊申歲季夏閏月壬子日感應至大歷五年庚戌歲夏六月甲午建

江水上源急如箭潭北轉急令目眩中間十里澄漫漫

龍蛇若見若不見老農老圃望天語儲潭之神可致雨
質明齋服躬往奠牢醴豐潔精誠舉女巫紛紛堂下儼
色似授兮意似與雲在山兮風在林風雲忽起潭更深
氣靈祠宇連江陰朝日不復照翠岑迴溪口兮擢清流
好風帶雨送到州吏人雨立喜再拜神兮靈兮如獻酬
城上樓兮危架空登四望兮暗濛濛不知兮千萬里惠
澤願兮與之同我有言兮報匪徐車騎復往禮如初高
垣墉兮大其門灑掃丹雘壯神居使過廟者之加敬酒

食貨財而有餘神兮靈神兮靈匪享慢享克誠

任要

兗州團練使詩一首

臘月中與韋戶曹游發生洞裴回之際見雙白

蝙蝠三飛洞門時多異之同為口號

貞元十四年第八句

缺二字

山翠竊靈洞洞深玄想微一雙白蝙蝠三度向明飛雖
然有兩翅了自無毛衣若非飽石髓那得凌
偶見
歸堪說殊勝不見歸

韋洪

京兆人官戶
曹詩一首

臘月中遊發生洞裴回之際見雙白蝙蝠三飛

洞門時多異之同為口號

第九句
缺一字

欲驗發生洞先開冰雪行窺臨見二翼色素飛無聲狀
類白蝙蝠幽感騰化精應知五馬來啓蟄迎春榮露寃
之久鳴騶還慰情

馬又

宣宗時人
詩一首

蜀中經蠻後寄陶雍

賊馬渡瀘水北來如鳥輕幾年期鳳闕一日破龜城此地有征戰誰家無死生人悲還舊里鳥喜下空營弟姪意初定交朋心尚驚自從經難後吟苦似猿聲

張紹

南唐人
詩一首

冲佑觀

大始未形混沌無際上下開運乾坤定位日月麗天山川鎮地萬彙猶屯三才始備肇有神化初生蒸民上惟立德下無踈親皇風蕩蕩黔首淳淳天下有道誰非聖

人開源嗜慾澆漓俗盛賢者避世真人革命八極神鄉
十州異境翠阜丹丘潛伏靈聖惟彼武夷實曰洞天峰
巒黛染巖岫霞鮮金房玉室羽蓋雲輶葬日風雨會有
神仙國步多艱皇綱中絕四海九州瓜分幅裂稔禍陬
隅阻兵甌越寂寞玄風荒涼絳闕赫赫烈祖再造丕基
拱揖高讓神人樂推明明我后允協昌基功崇下武德
茂重熙睿哲英斷雄畧神智拓土開疆經天緯地五嶺
來庭三湘清徹四海震威羣生懷惠猶勞宵旰猶混馬

車貪狼俟靜害馬方除淹留駿馭想像鶉居心懸真洞
夢到華胥乃眷名山追惟聖跡內庫頌金元侯奉職三
境求規五靈取則跨谷彌岡張霄架極珠宮寶殿璇臺
玉堂鳳翔高薨龍轉迴廊錯落金碧玲瓏壁璫雲生林
楚雷繞藩牆七聖斯嚴三君如在八景靈輿九華神蓋
清霄莫胥明霜匪對彷彿壺中依稀物外衆真之宇擬
之無倫會僊之類名之惟新高峰為壑區谷成垆皇獻
頌聲永絕溜磷

鄭露

字思叟號南湖莆田人太府卿詩一首

徹雲澗

延綿不可窮寒光徹雲際落石蚤雷鳴濺空春雨細

林披

字茂則號師道官刺史詩一首

秋氣尚高涼

秋氣尚高涼寒笛吹萬木故人入我庭相照不出屋山
川雖遠觀高懷不能掬

公孫杲

承宣郎行博城縣丞詩一首

五言贈諸法師

駕鶴排朱霧，乘鸞入紫煙。
凌晨味潭菊，薄暮翫峰蓮。
玉葉低梁下，金飈引窗前。
嘯傲雲霞際，留情鱗羽年。

李賔

定州司馬
詩一首

恒岳晨望有懷

二儀均四序，五嶽分九州。
靈造良難測，神功匪易酬。
恒山北臨岱，秀嶠東跨幽。
瀕洞鎮河朔，嵯峨冠嵩丘。
裡祠彰舊典，壇廟列平疇。
古樹侵雲密，飛泉界道流。
從官叨

佐理銜命奉珍羞薦玉申誠效鏘金諒有由郊原照初
日林薄委徂秋塞近風聲厲川長霧氣收他鄉饒感激
歸望切祈求景福如光願私門當復侯

暢甫

詩一首

偶宴西蜀摩訶池

珍木鬱清池風荷左右披淺觴寧及醉慢舸不知移蔭
林簟光冷照流簪影敲胡為獨羈者雪涕向漣漪

吳士矩

詩一首

飲後獻時相

士矩牧大郡因時相論置軍倅獻此

一夕心期一種歡
那知疎散負杯盤
尊前數片朝雲在
不許馮公子細看

吳黔

詩一首

失題

故國海雲端歸寧便整鞍
里榮身上倩省罷手中蘭
燒急平蕪廣風悲古木寒
謝公山色在朝夕共誰觀

崔融

乾寧中吳郡人詩一首

題惠聚寺

蘇州崑山縣惠聚寺殿基乃鬼神一夕砌成殿中有僧繇畫龍每因風雨

夜騰起波濤傷田害稼鄉人患之僧繇再畫一鎖鎖之仍畫一釘釘其鎖至今人捫其釘頭隱

隱融因
題寺辨

人莫嫌山小僧還愛寺靈殿高神氣力龍活客丹青

錢信

詩一首

平望贈蚊

安得神仙術試為施康濟使此平望村如吾江子匯

胡傳美

詩一首

武康碧落觀

仙宮碧落太微書遺蹟依然掩故居
幢節不歸天杳邈
煙霞空鎖日幽虛
不逢金簡扳雲洞
可惜瑤臺疊蘚除
欲脫儒衣陪羽客
傷心齒髮已凋疎

許宏

詩一首

白雲寺

踏破苔痕一逕斑
白雲飛處見青山
不知浮世塵中客
幾箇能知物外閒

文丙

詩五首

羅浮山

羅浮多勝境夢到固無因
知有長生藥誰為不死人
根雖盤地脉勢自倚天津
未便甘休去須棲老此身

牡丹

萬物承春各鬪奇
百花分貴近亭池
開時若也姮娥見
落日那堪公子知
詩客筵中金盞滿
美人頭上玉釵垂
不同寒菊舒重九
只擬清香泛酒卮

鮮花

寂寞人偏重無心媿牡丹
秋風凋不得流水泛應難怪
石從教徧幽庭一任盤
若逢公子顧重疊是朱欄

新栽松

可憐同百草況復雪霜姿
歌舞地不尚歲寒人自移
培除添冷淡毫末入思惟
盡道生雲洞誰知路嶮巖

柳

第二句
缺一字

何事動吟哦長翠色和垂陰
千樹少送別一枝多帶

霧籠彭澤搖風舞汴河只因隋帝植民力幾銷磨

路應

詩一首

仙巖四瀑布即事寄上祕書包監侍郎七兄吏
部李侍郎十七兄婺州趙中丞處州齊諫議明
州李九郎十四韻

絕境久蒙蔽芟蘿方迨茲樵蘇尚未及冠冕誰能知緣
崖開逕小架木度空危水激千雷發珠聯萬貫垂陰晴
狀非一畝旦勢多奇井識軒轅跡壇餘漢武基援聲響

深洞巖影倒澄池想像虬龍去依稀羽客隨翫奇目豈
倦尋異神忘疲干雲松作蓋積翠薜成帷含意攀丹桂
凝情顧紫芝芸香藹芳氣冰鏡徹圓規胥念滄波遠徒
懷魏闕期徵黃應計日莫鄙北山移

李縝

詩一首

奉和郎中遊仙巖四瀑布寄包祕監李吏部趙
婺州中丞齊處州諫議十四韻

符守分珪組放情在丘巒悠然造雲族忽爾登天壇求

古理方蹟翫奇物不殫晴光散崖壁瑞氣生芝蘭中有
四瀑水奔流狀千般風雲隱巖底雨雪霏林端晶晶含
古色颼颼引晨寒澄潭見援飲潛穴知龍盤坐憩苔石
遍仰窺杉桂攢幽蹊創高躅靈藥餘仙殮攜賞喜康樂
示文驚建安縑緗炳珠寶中外貽同官末調亦何為輒
陪高唱難慙非御徒者還得依門欄

戴公懷

詩一首

奉和郎中遊仙山四瀑泉兼寄李吏部包祕監

趙婺州齊處州

今日永嘉守復追山水遊因尋莽蒼野遂得軒轅丘訪
古事難究覽新情屢周溪垂綠篠暗巖度白雲幽過石
竒不盡出林香更浮憑高擁虎節搏險窺龍湫淙淙瀉
三四奔騰千萬秋寒驚殷雷動暑駭繁霜流沫濺羣鳥
外光搖數峰頭叢崖散滴瀝近谷藏飈颺況此特形勝
自餘非等儔靈光掩五嶽仙氣均十洲書以謝羣彥永
將叙徽猷當思共攀陟東南看斗牛

孟翔

詩一首

奉和郎中遊仙山四瀑布兼寄李吏部包祕監

判官

昔人恣探討飛流稱石門安知郡城側別有神泉源
疏鑿意大禹勤求聞軒轅悠悠幾千歲翳薈羣木繁
竒狀出蔽蔓勝槩畢討論泐崖百丈落奔注當空翻
下如散雨足上擬屯雲根變態凡幾處靜神竟朝昏
渴賢寄珠玉受馥尋蘭蓀羅寫腎紫綬巖隈駐朱
幡方思謝康樂

好事名空存

崔耿

詩一首

晚眺

江溶流落景山色凝暮煙
衰髮照秋日壯心減昔年
愁吟長抱膝孰訴高高天

宇文鼎

詩一首

山下泉

可致清川廣難量利物功
涓流此山下誰識去無窮

郭密之

詩一首

永嘉經謝公石門山作

綿境經耳目未嘗曠躋登一窺石門險再滌心神憎洞壑閱金澗欹崖盤石楞陰潭下冪冪秀嶺上層層千丈瀑流蹇半溪風雨絙興餘志每愜心遠道自弘乘輶廣儲峙祇命媿才能輟擢周氣象捫條歷騫崩忽如生羽翼恍若將起騰謝客今已矣我來誰與朋

扈載

詩一首

芳草

幽芳無處無幽處恨何如
倦客傷歸思春風滿舊居
晚煙迷杳靄朝露健扶疎
省傍靈光看殘陽少皞區

薛光謙

詩一首

任閬中下鄉檢田登艾蕭山北望

觀農巡井邑長望歷山川
擁澗開新耨緣崖指火田
荒村無徑陌古戍有風煙
瓠葉繁籬長藤花繞架懸
岸高攢樹石水淨寫雲天
迴首鄉關路行歌猶喟然

尉遲汾

朝散大夫守衛尉少卿詩一首

府尹王侍郎准制拜獄因狀嵩高靈勝寄呈三

十韻

雄雄天之中峻極聞維嵩作鎮盛標格出雲為雨風瑞

時物不癘順澤年多豐加高冠四方

白虎通云中央之嶽獨加高字者何

中央居四方之中可高故曰嵩高

視秩居三公明朝虔昭報頌祀歲嚴

恭署祝紆御札詔賢導宸衷皇皇三川守馨德清明躬

肅徒奉蘭沐竟夕玉華東星漢耿齋戶松泉寒壽宮具

修諒燭古曙色猶蔥蒙端儀大主立興俛聲玲瓏挹瓚
椒桂馥奏金巖壑空靈歆若有荅彷彿傳祝工卒事不
遑偃勝奇紛四叢朝霞破靈嶂錯落間蒼紅動息形似
蟻立黃氣如籠奔傾千萬狀羣嶽安比崇日月襟袖捧
人天道路通冥搜必殫竭躋覽忘崎穹踏翠徧諸剎趣
綿步難終浮丘仙袂接謝公屐齒窮龍潭應下瞰九曲
當駭容又有九龍潭在寺側崇崖對聳壁立千仞九曲分蓄緘黑不測龍門計東谿三
臺有何蹤雜道書云自嶽廟東二十里至一山名曰東龍門其東有三臺山昔漢武東巡過此山觀

三學仙女遂以為名焉

金象語

奚應
仙經云嵩高大巖下有佛圖音妙有大金像在中來語寺

僧密公密公時在嵩高寺寺在嵩脚下聞之欣然披林求索時白霧昏迷失路一往看之即入山水維觀一麝香去人三四步側足雙跳步步若有所引良久回顧去十步中忽有靛青色就視之得自然天池 **玉人**

光想融

盧元明嵩山記嶽廟畫為神像有一玉人長五寸玉色甚光潤制作亦佳莫知早晚所造蓋嶽

神之像相傳謂明公山中

瑶漿與石髓清骨宜遭逢

世說

嵩山北有大穴中觀二人圍碁有一枯白飲與墮者飲氣力十倍碁者問願停否墮者云不願碁者曰從此西行天井中多蛟龍但投身入井自當得出若飢取井物食之墮者如言可半年乃出蜀中問張華華曰此仙館大夫所飲者玉漿
況是降神處跡惟由甫同周翰已洽
所食者龍穴石髓

論伊衡亦期功誠富東山興須陟中台庸勉促旋駢軫
未可戀雲松散材事即異期為卜一峰

馬令

失名守博城
縣令詩一首

早春陪敕使麻先生

慈力

祭岳

久視二年
第
八句十一句十

二句各
缺一字

我皇盛文物道化天地先鞭撻走神鬼玉帛禮山川忽
下袁州使來遊紫洞前青羊得處所白鶴時年虔懇
飛龍記昭彰化鳥篇 風半山水 氣總雲煙光抱昇

中日霞明五色天
山橫翠微外
室在綠潭邊
緹幕灰初
展
焚林火欲然
年光著草樹
春色換山泉
伊水來何日
嵩巖去幾年
千山疑小天下
人是會神仙
葉令乘鳧入浮
丘
駕鶴旋麻姑
幾年歲三見
海成田



御定全唐詩卷八百八十七

欽定四庫全書

集部

御定全唐詩卷八百

八十八至九十一

詳校官庶吉士

臣何道沖

主事銜

臣

徐以坤覆勘

總校官知縣

臣

繆

琪

校對官學正

臣

卜

惟

吉

謄錄監生

臣

袁

瑩

欽定四庫全書

御定全唐詩卷八百八十八

靈澈

詩一首

奉和郎中題仙巖瀑布十四韻

致閑在一郡民安已三年每懷貞士心孫許猶差肩採
異百代後得之古人前捫險路塊北臨深聞潺湲上有
千歲樹下飛百丈泉清谷長雷雨丹青凝霜煙遙將大
壑近閭與方壺連白石顏色寒老藤花葉鮮軒皇自茲

去喬木空依然碧山東極海明月高昇天平野生竹柏
雖遠地不偏永願酬國恩自將布金田穆穆早朝人英
英丹陛賢誰思滄洲意方欲涉巨川

貫休

詩一首

過商山

吟緣橫翠憶天台嘯狖啼猿見盡猜四箇老人何處去
一聲仙鶴過溪來皇城宮闕迴頭盡紫閣煙霞為我開
天際峰峰盡堪住紅塵中去大悠哉

齊已

詩一首

過西塞山

空江平野流風島葦颼颼殘日銜西塞孤帆向北洲
邊鴻渡漢口楚樹出吳頭終日高雲裏身依片石休

可朋

詩一首

中秋月

登樓仍喜此宵晴圓魄纔觀思便清海面乍浮猶隱映
天心高挂最分明片雲想有神仙出迴野應無鬼魅形

曾向洞庭湖上看君山半霧水初平

修睦

詩七首

僧院泉

澄澈照人膽深山只一般來難窮處所心去助波瀾砌
曲夜聲苦窗虛客夢闌無心誰有愛時有老僧看

題僧院泉

何處雲根新布得歸仍半日在煙蘿莫輕竹引經窗小
須信更深入耳多繞砌雖然清自別出門長恐濁相和

從此無心戀滄海滄海無風亦起波

岳上作

始好步青苔蟬聲且莫催辛勤來到此容易便言迴遠
水月未上四方雲正開更堪逢道侶特地話天台

望西山

積翠異諸嶽令人看莫休有時經暮雨獨得倚高樓雲
外僧應老林間水正秋到頭歸隱處豈在問嵩丘

題虎掬泉

一自虎掊得清聲四遠流衆人憐爾處長夜洗心頭出
谷花隨去背巖援下偷林遶落江徼風起雨脩脩

松

細韻颼颼入骨涼影兼巢鶴過高牆盤根一種依平地
自是梧桐不久長

岳陽對柳

誰此種秋色令人看莫窮正垂雲夢雨不奈洞庭風昔
出長安道獨遊隋苑東當時今日思湏信苦相同

清豁

陳洪進表奏賜號
性空禪師詩一首

歸山吟

聚如浮沫散如雲聚不相將散不分入郭當時君是我
歸山今日我非君

吳筠

詩六
首

遊倚帝山二首

山間非吾心物表翼所託振衣超煩滓策杖追岑壑絕
地窮崕呀造天究磐礴邇臨煙霞積逖睇宇宙廓俯驚

白雲涌仰駭飛泉落苔濃鮮翠屏松古麗丹嶠目冀覩
喬羨心希馭龍鶴乃知巢由情豈伊獫鳥樂

茲山何獨秀萬仞倚昊蒼晨躋煙霞趾夕憇靈仙場俯
觀海上月坐弄浮雲翔松風振雅音桂露含晴光不出
六合外超然萬累忘信彼古來士巖棲道彌彰

翰林院望終南山

竊慕隱淪道所歡巖穴居誰言忝休命遂入承明廬物
情不可易幽中未嘗攄幸見終南山峒堯凌太虛

青靄長不滅白雲閑卷舒悠然相探討延望空躊躇迹
繫心無極神超興有餘何當解維繫永託逍遙墟

秋日彭蠡湖中觀廬山

泛舟太湖上迴瞰茲山隈萬頃滄波中千峯鬱崔嵬涼
煙發爐嶠秋日明帝臺絕巔凌大漠懸流瀉昭回穹崇
石梁引岍豁天門開飛鳥屢隱見白雲時往來超然契
清賞目醉心悠哉董氏出六合王君升九垓誰言曠遐
祀庶可相追陪從此永棲託拂衣謝浮埃

秋日望倚帝山

楚服多奇山靈表先倚帝孤秀白雲裏青冥何崇麗秋
天已晴朗晚日更澄霽遠峯列在目杳與神襟契倏忽
遺世間宛如再登詣伊予抱斯志代處人煙閉何事牽
俗網悠然負芝桂竭來從隱淪式保美門計

李冶

詩二
首

薔薇花

翠融紅綻渾無力斜倚欄干似託人深處最宜香惹蝶

摘時蕙恐焰燒春當空巧結玲瓏帳著地能鋪錦繡裯
最好凌晨和露看碧紗窗外一枝新

柳

最愛纖纖曲水濱夕陽移影過青蘋東風又染一年綠
楚客更傷千里春低葉已藏依岸櫂高枝應閉上樓人
舞腰漸重煙光老散作飛綿惹翠裉

御定全唐詩卷八百八十八

欽定四庫全書

御定全唐詩卷八百八十九

詞

唐人樂府元用律絕等詩雜和聲歌之具并和聲作實字長短句以就曲拍者為填詞開元

天寶肇其端元和太和衍其流大中咸通以後迄於南唐二蜀尤家工戶習以盡其變凡有五音二十八調各有分屬今皆失傳

明皇帝

好時光

寶髻偏宜宮樣蓮臉嫩體紅香眉黛不須張敞畫天教

入鬢長 莫倚傾國貌嫁取箇有情郎彼此當年少莫
負好時光

昭宗皇帝

巫山一段雲

縹緲雲間質盈盈波上身袖羅斜舉動埃塵明豔不勝
春 翠鬢晚妝煙重寂寂陽臺一夢水眸蓮臉見長新
巫峽更何人

蝶舞梨園雪鶯啼柳帶煙小池殘日豔陽天芡蘿山又

山青鳥不來愁絕忍看鴛鴦雙結春風一等少年心
閒情恨不禁

菩薩蠻

一名子夜歌一名巫山
一片雲一名重疊金

登樓遙望秦宮殿
茫茫只見雙飛燕
渭水一條流千山
與萬丘
遠煙籠碧樹
陌上行人去
安得有英雄
迎歸

大內中

一作何處是英
雄迎儂歸故宮

飄飄且在三峰下
秋風往往堪霑腸
斷憶仙宮勝
煙霧中
思夢時時睡不語
長如醉
早晚是歸期
蒼

穹知不知

後唐莊宗

名存勗在位四年謚日光聖神閔詞四首

一葉落

一葉落寥朱箔此時景物正蕭索畫樓月影寒西風吹
羅幕吹羅幕往事思量著

如夢令

一名憶仙姿一名宴桃源一名比梅

曾宴桃源深洞一曲清歌舞鳳長記別伊時和淚出門
相送如夢如夢殘月落花煙重

陽臺夢

薄羅衫子金泥縫。困纖腰、怯銖衣重。笑迎移步小蘭叢。
彈金翹玉鳳。嬌多情脈脈。羞把同心撚弄。楚天雲雨
却相和。又入陽臺夢。

歌頭

賞芳春暖。風飄箔。鶯啼綠樹。輕煙籠晚閣。杏桃紅開繡。
萼靈和殿。禁柳千行斜。金絲絡。夏雲多奇峯。如削。紈扇
動微涼。輕綃薄。梅雨霽。火雲爍。臨水檻。永日逃。繡暑泛。

觥酌露華濃
冷高梧彫萬葉
一霎晚風蟬聲新
雨歇
惜惜此光陰
如流水東籬菊殘時
歎蕭索
繇陰積歲時
暮景難留
不覺朱顏失却
好容光
且須呼賓友
西園
長宵讌雲謠歌皓齒
且行樂

南唐嗣主李璟

浣溪沙

一作浣紗溪
一名小庭花

風壓輕雲貼水飛
乍晴池館燕爭泥
沈郎多病不勝衣
沙上未聞鴻雁信
竹間時聽鷓鴣啼
此情惟有落花

知

攤破浣溪沙

一名山花子

菡萏香銷翠葉殘
西風愁起綠波間
還與韶光共顚顚
不堪看
細雨夢回雞塞遠
小樓吹徹玉笙寒
多少淚珠何限恨
倚闌干

手卷真珠上玉鉤
依前春恨瑣重樓
風裏落花誰是主
思悠悠
青鳥不傳雲外信
丁香空結雨中愁
回首綠波三峽暮
接天流

後主煜

漁父

一名漁歌子

浪花有意千里雪
桃花無言一隊春
一壺酒一竿身快
活如儂有幾人

一櫂春風一葉舟
一綸繭縷一輕鉤
花滿渚酒滿甌
萬頃波中得自由

憶江南

一名望江南
一名夢江南
一名江南好
一名夢江口
一名望江梅
一名歸塞北

一名謝秋娘

一名春去也

多少恨昨夜夢魂中還似舊時遊上苑車如流水馬如
龍花月正春風

多少淚霑袖復橫頤心事莫將和淚滴鳳笙休向月明
吹腸斷更何疑

閒夢遠南國正芳春船上管絃江面綠滿城飛絮混輕
塵愁殺看花人

閒夢遠南國正清秋千里江山寒色暮蘆花深處泊孤
舟笛在月明樓

擣練子

一名深院月

深院靜小庭空斷續寒砧斷續風無奈夜長人不寐數聲和月到簾櫳

雲鬟亂晚妝殘帶恨睂兒遠岫攢斜托香顚春筍嬾為誰和淚倚闌干

相見歡

一名烏夜啼一名上西樓一名西樓子一名月上瓜洲一名秋夜月一名憶真

妃

林花謝了春紅太匆匆無奈朝來寒雨晚來風 胭脂

淚相留醉幾時重自是人生長恨水長東

無言獨上西樓月如鉤寂寞梧桐深院鎖清秋
翦不斷理還亂是離愁別是一般滋味在心頭

長相思

一名雙紅豆一名山
漸青一名憶多嬌

一重山兩重山山遠天高烟水寒相思楓葉丹
菊花
開菊花殘塞雁高飛人未還一簾風月閑

雲一緺玉一梭澹澹衫兒薄薄羅輕顰雙黛螺
秋風
多雨如和簾外芭蕉三兩窠夜長人奈何

浣溪沙

紅日已高三丈透金爐次第添香獸紅錦地衣隨步皺
佳人舞點金釵溜酒惡時拈花蕊顛別殿遙聞簫鼓
奏

轉燭飄蓬一夢歸欲尋陳迹悵人非天教心願與身違
待月池臺空逝水蔭花樓閣漫斜暉登臨不惜更沾
衣

采桑子

一名醜奴兒一名羅敷媚一名羅敷歌

輓轡金井梧桐晚幾樹驚秋
畫雨如愁百尺蝦須上玉
鉤
瓊窗春斷雙蛾皺回首邊頭
欲寄鱗游九曲寒波
不泝流

亭前春逐紅英盡舞態徘徊
細雨霏微不放雙眉時暫
開
綠窗冷靜芳音斷香印成
灰可柰情懷欲睡朦朧
入夢來

菩薩蠻

花明月暗籠輕霧今宵好向
郎邊去
剗鞦韆步香階手提

金縷鞋 畫堂南畔見一晌偎人顫
奴為出來難教君
恁意憐

蓬萊院閉天台女畫堂晝寢無人語
拋枕翠雲光繡衣
聞異香 潛來珠鎖動驚鴻
覺鴛鴦夢慢臉笑盈盈相看
無限情

銅簧韻脆鏘寒竹新聲慢奏移纖玉
眼色暗相鉤秋波
橫欲流 雨雲深繡戶來便諧
衷素宴罷又成空夢迷
春睡中

人生愁恨何能免，消魂獨我情何限。
故國夢重歸，覺來雙淚垂。
高樓誰與上，長記秋晴望。
往事已成空，還如一夢中。

清平樂

一名憶
蘿月

別來春半，觸目愁腸斷。
砌下落梅如雪亂，拂了一身還滿。
雁來音信無憑，路遙歸夢難成。
離恨却如春草，更行更遠還生。

喜遷鶯

一名鶴冲天
一名燕歸來

曉月墜宿雲微無語枕頻欹夢回芳草思依依天遠雁
聲稀啼鶯散餘花亂寂寞畫堂深院片紅休埽儘從
伊留待舞人歸

阮郎歸

一名醉桃源
一名碧桃春

東風吹水日銜山春來長是閑落花狼藉酒闌珊笙歌
醉夢間春睡覺晚妝殘無人整翠鬟留連光景惜朱
顏黃昏獨倚闌

錦堂春

一名烏
夜啼

昨夜風兼雨，簾幃颯颯秋。
聲燭殘，漏滴頻欹枕，起坐不能平。
世事漫隨流水，算來一夢浮生。
醉鄉路穩宜頻到，此外不堪行。

應天長

一鉤初月臨妝鏡，蟬鬢鳳釵慵不整。
重簾靜，層樓迥，惆悵落花風不定。
柳堤芳草徑，夢斷轆轤金井。
昨夜更闌酒醒，春愁過却病。

望遠行

碧砌花光照眼明
朱扉長日鎮長扃
餘寒欲去夢難成
爐香煙冷自亭亭
遼陽月秣陵砧不傳消息但傳情
黃金臺下忽然驚
征人歸日二毛生

浪淘沙

一名賣花聲

簾外雨潺潺
春意闌珊
羅衾不耐五更寒
夢裏不知身
是客一晌貪歡
獨自暮凭闌
無限江山別時容易見
時難流水落花春去也
天上人間

往事只堪哀
對景難排
秋風庭院薜侵階
一桁珠簾閑

不卷終日誰來 金釧已沉埋壯氣蒿萊晚涼天淨月
華開想得玉樓瑤殿影空照秦淮

木蘭花

一名玉樓春一名春曉曲一名惜春容

晚妝初了明肌雪春殿嬪娥魚貫列鳳簫聲斷水雲閒
重按霓裳歌徧徹臨風誰更飄香屑醉拍闌干情未
切歸時休放燭花紅待蹋馬蹄清夜月

虞美人

風回小院庭蕪綠柳眼春相續凭欄半日獨無言依舊

竹聲新月似當年
笙歌未散尊罍在
池面冰初解
燭明香暗畫樓深
滿鬢清霜殘雪
思難禁

春花秋月何時了
往事知多少
小樓昨夜又東風
故國不堪回首月明中
雕闌玉砌應猶在
只是朱顏改
問君能有幾多愁
恰似一江春水向東流

一斛珠

一名醉落魄

晚妝初過沈檀輕
注些兒箇
向人微露丁香顆
一曲清歌暫引櫻桃破
羅袖裊殘殷色可
杯深旋被香醪浣

繡牀斜凭嬌無那爛嚼紅茸笑向檀郎唾

臨江仙

櫻桃落盡春歸去蝶翻輕粉雙飛子規啼月小樓西玉
鉤羅幕惆悵暮煙垂別巷寂寥人散後望殘煙草低
迷爐香閑嫋鳳皇兒空持羅帶回首恨依依

蝶戀花

一名一籬金一名黃金縷一名明月生
南浦一名鳳棲梧一名鵲蹋枝一名卷

珠簾一名

魚水同歡

遙夜亭皋閒信步纔過清明漸覺傷春暮數點雨聲風

約住朦朧澹月雲來去
桃李依依香暗度誰在鞦韆
笑裏輕輕語一片芳心千萬緒人間沒箇安排處

破陣子

一名十拍子

四十年来家國三千里地山河鳳闕龍樓連霄漢玉樹
瓊枝作煙蘿幾曾識干戈一旦歸為臣虜沈腰潘鬢
銷磨最是蒼黃辭廟日教坊獨奏別離歌垂淚對宮娥
蜀主王衍

醉妝詞

者邊走那邊走只是尋花柳那邊走者邊走莫厭金杯酒

甘州曲

畫羅裙能解束稱腰身柳眉桃臉不勝春薄媚足精神
可惜淪落在風塵

後蜀主孟昶

木蘭花

冰肌玉骨清無汗水殿風來暗香滿繡簾一點月窺人

敬枕釵橫雲鬢亂 起來瓊戶啓無聲時見疎星渡河

漢屈指西風幾時來只恐流年暗中換

蘇軾洞仙歌
卽樂括此詞

御定全唐詩卷八百八十九

欽定四庫全書

御定全唐詩卷八百九十

李景伯

一首

回波樂

回波爾時酒卮微微臣職在箴規侍宴既過三爵誼譁竊
恐非儀

沈佺期

一首

回波樂

回波爾時仝期流向嶺外生歸身名已蒙齒錄袍笏未
復牙緋

裴談一首

回波樂

回波爾時拷拷怕婦也是大好外邊祇有裴談內裏無
過李老

張說六首

舞馬詞

萬玉朝宗鳳宸千金率領龍媒眊鼓凝騎蹀躞聽歌弄
影徘徊

天鹿遙徵衛叔日龍上借羲和將共兩驂爭舞來隨八
駿齊歌

綵旄八佾成行時龍五色因方屈膝銜杯赴節傾心獻
壽無疆

帝皐龍駒沛艾星闌驥子權奇騰倚驤洋應節繇驕接
迹不移

二聖先天合德羣靈率土可封擊石騶驪紫燕擬金顧
步蒼龍

聖君出震應錄神馬浮河獻圖足蹋天庭鼓舞心將帝
樂踟躕

崔液 二首

蹋歌詞

此詞五言六句與拋球樂相似惟於第五句用韻不同或將第二首末二句作

上七言下三言讀
改入詞調者誤

綵女迎金屋仙姬出畫堂駕鶯裁錦袖翡翠貼花黃歌

響舞分行豔色動流光

庭際花微落樓前漢已橫金壺催夜盡羅袖舞寒輕樂
笑暢歡情未半著天明

李白

十四首

桂殿秋

仙女下董雙成漢殿夜涼吹玉笙曲終却從仙官去萬
戶千門惟月明

河漢女玉鍊顏雲駟往往在人間九霄有路去無跡嫋

媚香風生佩環

清平調

雲想衣裳花想容
春風拂檻露華濃
若非羣玉山頭見
會向瑤臺月下逢

一枝紅豔露凝香
雲雨巫山枉斷腸
借問漢宮誰得似
可憐飛燕倚新妝

名花傾國兩相歡
常得君王帶笑看
解得春風無限恨
沈香亭北倚闌干

連理枝

雪蓋宮樓閉羅幕昏金翠
鬪壓闌干香心澹薄梅梢輕
倚噴寶猊香燼麝煙濃馥
紅綃翠被

淺畫雲垂帔點滴昭陽淚
咫尺宸居君恩斷絕似遙千
里望水晶簾外竹枝寒守羊
車未至

菩薩蠻

平林漠漠煙如織寒山一帶傷心碧
暝色入高樓有人樓上愁
玉階空佇立宿鳥歸飛急
何處是歸程長亭

更短亭

憶秦娥

一名秦樓月 一名碧雲深 一名雙荷葉

簫聲咽秦娥夢斷秦樓月秦樓月年年柳色灞陵傷別
樂遊原上清秋節咸陽古道音塵絕音塵絕西風殘
照漢家陵闕

清平樂

一名憶蘿月

禁庭春晝鶯羽披新繡百草巧求花下鬪祇賭珠璣滿
斗日晚却理殘妝御前閑舞霓裳誰道腰肢窈窕折

旋笑得君王

禁闌秋夜月探金窗罅玉帳鴛鴦噴蘭麝時落銀燈香
爇女伴莫話孤眠六宮羅綺三千一笑皆生百媚宸
衷教在誰邊

煙深水闊音信無由達惟有碧天雲外月偏照懸懸離
別盡日感事傷懷愁看似鎖難開夜夜長留半被待
君魂夢歸來

鸞衾鳳褥夜夜常孤宿更被銀臺紅蠟燭學妾淚珠相

續花貌些子時光拋人遠泛瀟湘欹枕悔聽寒漏聲
聲滴斷愁腸

畫堂晨起來報雪花墜高卷簾櫳看佳瑞皓色遠迷庭
砌盛氣光引爐煙素草寒生玉佩應是天仙狂醉亂
把白雲揉碎

元結

五首

欵乃曲

偶存名跡在人間順俗與時未安間來謁大官兼問政

扁舟却入九疑山

湘江二月春水平滿月和風宜夜行
唱橈欲過平陽戍
守吏相呼問姓名

千里楓林煙雨深無朝無暮有猿吟
倚橈靜聽曲中意
好似雲山韶濩音

零陵郡北湘水東
浯溪形勝滿湘中
溪口石顛堪自逸
誰能相伴作漁翁

下瀧船似入深淵
上瀧船似欲升天
瀧南始到九疑郡

應絕高人乘興船

張志和五首

漁父

西塞山前白鷺飛
桃花流水鱖魚肥
青箬笠綠蓑衣
斜風細雨不須歸

釣臺漁父褐為裘
兩兩三三舴艋舟
能縱櫂慣乘流
長江白浪不曾憂

雪溪灣裏釣魚翁
舴艋為家西復東
江上雪浦邊風笑

著荷衣不歎窮

松江蟹舍主人歡
菰飯蓴羹亦共餐
楓葉落荻花乾
醉宿漁舟不覺寒

青草湖中月正圓
巴陵漁父櫂歌連
釣車子櫂頭船樂
在風波不用仙

張松齡一首

漁父

樂是風波釣是閒
草堂松檜已勝攀
太湖水洞庭山狂

風浪起且須還

韓翃一首

章臺柳

寄柳氏

章臺柳章臺柳往日依依今在否縱使長條似舊垂也
應攀折他人手

韋應物四首

三臺

或加令字一名翠華引一名開元樂

一年一年老去明日後日花開未報長安平定萬國豈

王建 十首

三臺

宮中二首
江南四首

魚藻池邊射鴨芙蓉苑裏看花
日色柘袍相似不著紅
鸞扇遮

池北池南草綠殿前殿後花紅
天子千秋萬歲未央明
月清風

揚州橋邊小婦長干市裏商人
三年不得消息各自拜
鬼求神

青草湖邊草色飛
猿嶺上猿聲萬里三湘客到有風有雨人行

樹頭花落花開道上人去人來朝愁暮愁即老百年幾度三臺

鬪身彊健且為頭白齒落難追準擬百年千歲能得幾許多時

調笑令

即宮中調笑

團扇團扇美人竝來遮面玉顏顚顚三年誰復商量管

弦弦管弦管春草昭陽路斷

胡蝶胡蝶飛上金枝玉葉君前對舞春風百葉桃花樹
紅紅樹紅樹燕語鶯啼日暮

羅袖羅袖暗舞春風依舊遙看歌舞玉樓好日新妝坐
愁愁坐愁坐一世虛生虛過

楊柳楊柳日暮白沙渡口船頭江水茫茫商人少婦斷
腸腸斷腸斷斷鷓鴣夜飛失伴

戴叔倫 一首

調笑令

即轉
應曲

邊草邊草邊草盡來兵老山南山北雪晴千里萬里月
明明月明月胡笳一聲愁絕

劉禹錫八首

紇那曲 二首

楊柳鬱青青竹枝無限情同郎一回顧聽唱紇那聲
蹋曲興無窮調同辭不同願郎千萬壽長作主人翁

憶江南

即春
去也

春去也多謝洛城人弱柳從風疑舉袂叢蘭裛露似霑
巾獨坐亦含顰

春去也共惜豔陽年猶有桃花流水上無辭竹葉醉尊
前惟待見青天

瀟湘神

湘水流湘水流九疑雲物至今愁若問二妃何處所零
陵芳草露中秋

斑竹枝斑竹枝淚痕點點寄相思楚客欲聽瑤瑟怨瀟

湘深夜月明時

拋球樂

五色繡團圓登君瑋筵最宜紅燭下偏稱落花前上
客如先起應須贈一船

春早見花枝朝朝恨發遲及看花落後却憶未開時幸
有拋球樂一杯君莫辭

白居易

九首

花非花

花非花霧非霧夜半來天明去來如春夢不多時去似
朝雲無覓處

憶江南

江南好風景舊曾諳日出江花紅勝火春來江水綠如
藍能不憶江南

江南憶最憶是杭州山寺月中尋桂子郡亭枕上看潮
頭何日更重遊

江南憶其次憶吳宮吳酒一杯春竹葉吳娃雙舞醉笑

蓉早晚得相逢

如夢令

前度小花靜院不比尋常時見見了又還休愁却等閒
分散腸斷腸斷記取釵橫鬢亂

落月西窗驚起好箇忽忽些子鬢鬢輕鬆凝了一雙
秋水告你告你休向人間整理

頻日雅歡幽會打得來來越睽說著暫分飛感損一雙
眉黛無奈無奈兩箇心兒總待

長相思

汴水流 泗水流 流到瓜洲古渡頭 吳山點點愁
悠悠 悠悠 恨到歸時方始休 月明人倚樓

深畫眉 淺畫眉 蟬鬢鬢 雲滿衣 陽臺行雨回 巫山
高巫山 低暮雨 瀟瀟郎不歸 空房獨守時

劉長卿一首

謫仙怨

集作律詩題云苕溪
酬梁耿別後見寄

晴川落日初低 惆悵孤舟解攜 鳥向平蕪遠近人隨流

水東西 白雲千里萬里明月前溪後溪獨恨長沙謫
去江潭春草萋萋

竇弘餘

常之子官至台
州刺史詞一首

廣謫仙怨

并序

天寶十五載正月安祿山反陷沒洛陽王師敗績
關門不守車駕幸蜀途次馬嵬驛六軍不發賜貴
妃自盡然後駕行次駱谷上登高下馬望秦川遙
辭陵廟再拜嗚咽流涕左右皆泣謂力士曰吾聽

九齡之言不到於此乃命中使往韶州以太牢祭之因上馬索長笛吹笛曲成潸然流涕佇立久之時有司旋錄成譜及鑾駕至成都乃進此譜請名曲帝謂吾因思九齡亦別有意可名此曲為謫仙怨其音屬馬嵬之事厥後以亂離隔絕有人自西川傳得者無由知但呼為劒南神曲其音怨切諸曲莫比大厯中江南人盛為此曲隨州刺史劉長卿左遷睦州司馬祖筵之內長卿遂撰其詞吹之

為曲意頗自得蓋亦不知本事余既備知聊因暇
日撰其辭復命樂工唱之用廣其不知者

邊塵犯闕衝關金輅提攜玉顏雲雨此時蕭散君王何
日歸還傷心朝恨暮恨回首千山萬山獨望天邊初
月蛾眉猶自彎彎

康駢

字駕輕池州人登第為崇文館校書郎後為田
頤客薦授中書舍人所著有劇談錄詞一首

廣謫仙怨

并序

竇使君序謫仙怨云劉隨州之辭未知本事及詳

其意但以貴妃為懷蓋明皇登駱谷之時實有思
賢之意竇之所製殊不逮焉駢因更廣其辭蓋欲
兩全其事雖才情淺拙不逮二公而理或可觀貽
諸識者

晴山礙目橫天綠疊君王馬前鑾輅西巡蜀國龍顏東
望秦川曲江魂斷芳草妃子愁凝暮烟長笛此時吹
罷何言獨為嬋娟

御定全唐詩卷八百九十

欽定四庫全書

御定全唐詩卷八百九十一

杜牧 一首

八六子

洞房深畫屏燈照山色凝翠沈沈聽夜雨冷滴芭蕉驚
斷紅窗好夢龍煙細飄繡衾辭恩久歸長信鳳帳蕭疎
椒殿閒扃輦路苔侵繡簾垂遲遲漏傳丹禁薜華偷
悴翠鬟羞整愁坐望處金輿漸遠何時綵仗重臨正消

魂梧桐又移翠陰

崔懷寶

河南司隸
詞一首

憶江南

平生願願作樂中
箏得近玉人纖手
子研羅裙上放嬌
聲便死也為榮

鄭符

一首

閒中好

閒中好盡日松為侶
此趣人不知
輕風度僧語

段成式 一首

閒中好

閒中好塵務不縈心
坐對當窗木看移三面陰

張希復 一首

閒中好

閒中好幽磬度聲遲
卷上論題肇畫中僧姓支

溫庭筠 五十
九首

南歌子

歌或作柯一
名春宵曲

手裏金鸚鵡，胸前繡鳳凰。偷眼暗形相，不如從嫁與，作鴛鴦。

似帶如絲柳，團酥握雪花。簾卷玉鉤斜，九衢塵欲暮，逐香車。

倭墮低梳髻，連娟細掃眉。終日兩相思，為君憔悴盡，百花時。

臉上金霞細，眉間翠鈿深。欹枕覆鴛衾，隔簾鶯百轉，感君心。

撲藥添黃子呵花滿翠鬟
鴛枕映屏山月明三五夜對
芳顏

轉盼如波眼娉婷似柳腰
花裏暗相招憶君腸欲斷恨
春宵

嬾拂鴛鴦枕休縫翡翠裙
羅帳罷爐熏近來心更切為
思君

荷葉杯

一點露珠凝冷波影滿池塘
綠莖紅豔兩相亂腸斷水

風涼

鏡水夜來秋月如雪采蓮時小娘紅粉對寒浪惆悵正
思惟

楚女欲歸南浦朝雨濕愁紅小船搖漾入花裏波起隔
西風

憶江南

千萬恨恨極在天涯山月不知心裏事水風空落眼前
花搖曳碧雲斜

梳洗罷獨倚望江樓過盡千帆皆不是斜暉脈脈水悠悠腸斷白蘋洲

蕃女怨

萬枝香雪開已遍細雨雙燕鈿蟬箏金雀扇畫梁相見鴈門消息不歸來又飛回

磧南沙上驚鴈起飛雪千里玉連環金鏃箭年年征戰畫樓離恨錦屏空杏花紅

遐方怨

憑繡檻解羅幃未得君書斷腸滿湘春鴈飛不知征馬
幾時歸海棠花謝也雨霏霏

花半拆雨初晴未卷珠簾夢殘惆悵聞曉鶯宿妝眉淺
粉山橫約鬟鸞鏡裏繡羅輕

訴衷情

一名一絲風

鶯語花舞春晝午雨霏微金帶枕宮錦鳳凰帷柳弱燕
交飛依依遼陽音信稀夢中歸

定西番

漢使昔年離別攀弱柳折寒梅上高臺
千里玉關春雪鴈來人不來羌笛一聲愁絕月裴回

海燕欲飛調羽萱草綠杏花紅隔簾櫳
雙鬢翠霞金縷一枝春豔濃樓上月明三五瑣窗中

細雨曉鶯春晚人似玉柳如眉正相思
羅幕翠簾初卷鏡中花一枝腸斷塞門消息鴈來稀

思帝鄉

花花滿枝紅似霞羅袖畫簾腸斷卓香車
回面共人閒

語戰篴金鳳斜惟有阮郎春盡不歸家

酒泉子

四首

花映柳條間向綠萍池上凭欄干窺細浪雨蕭蕭近
來音信兩疎索洞房空寂寞掩銀屏垂翠箔度春宵

日映紗窗金鴨小屏山碧故鄉春煙靄隔背蘭缸宿
妝惆悵倚高閣千里雲影薄草初齊花又落燕飛雙

楚女不歸樓枕小河春水月孤明風又起杏花稀玉

釵斜簪雲鬟重裙上金縷鳳八行書千里夢鴈南飛

羅帶惹香猶繫別時紅豆淚痕新金縷舊斷離腸一

雙嬌燕語雕梁還是去年時節綠楊濃芳草歇柳花狂

玉蝴蝶

秋風淒切傷離行客未歸時塞外草先衰江南鴈到遲
芙蓉凋嫩臉楊柳墮新眉搖落使人悲斷腸誰得知

女冠子 二首

含嬌含笑宿翠殘紅幼窈窕鬢如蟬寒玉簪秋水輕紗卷
碧煙雪霄鸞鏡裏琪樹鳳樓前寄語青娥伴早求仙

霞帔雲髮鈿鏡仙容似雪畫愁眉遮語回輕扇含羞下
繡幃 玉樓相望久花洞恨來遲早晚乘鸞去莫相遺

歸國遙

國一作自
遙一作謠

香玉翠鳳寶釵垂景霰鈿筐交勝金粟越羅春水綠
畫堂照簾殘燭夢餘更漏促謝娘無限心曲曉屏山斷
續

雙臉小鳳戰篋金貼豔舞衣無力風飲藕絲秋色染
錦帳繡幃斜掩露珠清曉簾粉心黃藥花壓黛眉山雨

點

菩薩蠻

小山重疊金明滅
鬢雲欲度香顚雪
嬾起畫蛾眉
弄妝梳洗遲
照花前後鏡
花面交相映
新帖繡羅襦
雙雙金鷓鴣

水精簾裏頗黎枕
暖香惹夢鴛鴦錦
江上柳如煙
鴈飛殘月天
藕絲秋色淺
人勝參差翦
雙鬢隔香紅
玉釵頭上風

藥黃無限當山額宿妝隱笑紗窗隔相見牡丹時暫來
還別離 翠釵金作股釵上蝶雙舞心事竟誰知月明
花滿枝

翠翹金縷雙鴻驚水文細起春池碧池上海棠梨雨晴
紅滿枝 繡衫遮笑靨煙草黏飛蝶青瑣對芳菲玉關
音信稀

杏花含露團香雪綠楊陌上多離別燈在月朧明覺來
聞曉鶯 玉鈎褰翠幕妝淺舊眉薄春夢正闌情鏡中

蟬鬢輕

玉樓明月長相憶
柳絲婀娜春無力
門外草萋萋送君
聞馬嘶
畫羅金翡翠
香燭銷成淚
花落子規啼
綠窗殘夢迷

鳳凰相對盤金縷
牡丹一夜經微雨
明鏡照新妝
鬢輕
雙臉長
畫樓相望久
闌外垂絲柳
音信不歸來
社前雙燕回

牡丹花謝鶯聲歇
綠楊滿院中庭月
相憶夢難成
背窗

燈半明 翠鈿金壓臉寂寞香閨掩人遠淚闌干燕飛
春又殘

滿宮明月梨花白故人萬里關山隔金鴈一雙飛淚痕
霑繡衣 小園芳草綠家住越溪曲楊柳色依依燕歸
君不歸

寶函鈿雀金鸂鶒沈香閣上吳山碧楊柳又如絲驛橋
春雨時 畫樓音信斷芳草江南岼鸞鏡與花枝此情
誰得知

南園滿地堆輕絮愁聞一霎清明雨雨後却斜陽杏花
零落香無言勻睡臉枕上屏山掩時節欲黃昏無慘
獨倚門

夜來皓月纔當午重簾悄悄無人語深處麝煙長臥時
留薄妝當年還自惜往事那堪憶花露月明殘錦衾
知曉寒

雨晴夜合玲瓏日萬枝香媚紅絲拂閑夢憶金堂滿庭
萱草長繡簾垂衆靱眉黛遠山綠春水渡溪橋凭闌

魂欲消

竹風輕動庭除冷
珠簾月上玲瓏影
山枕隱濃妝綠檀
金鳳凰
兩蛾愁黛淺
故國吳宮遠
春恨正關情
畫樓殘點聲

玉纖彈處真珠落
流多暗濕鉛華薄
春露浥朝花
秋波浸晚霞
風流心上物
本為風流出
看取薄情人
羅衣無此痕

清平樂

上陽春晚宮女愁蛾淺新歲清平思同輦爭奈長安路
遠鳳帳鴛被徒熏寂寞花瑣千門競把黃金買賦為
妾將上明君

洛陽愁絕楊柳花飄雪終日行人爭攀折橋下水流鳴
咽上馬爭勸離觴南浦鴛聲斷腸愁殺平原年少回
首揮淚千行

更漏子

柳絲長春雨細花外漏聲迢遞驚塞鴈起城烏畫屏金

鷓鴣 香霧薄透簾幕惆悵謝家池閣紅燭背繡簾垂
夢長君不知

星斗稀鐘鼓歇簾外曉鶯殘月蘭露重柳風斜滿庭堆
落花 虛閣上倚闌望還似去年惆悵春欲暮思無窮
舊歡如夢中

金雀釵紅粉面花裏暫時相見知我意感君憐此情須
問天 香作穗蠟成淚還似兩人心意山枕膩錦衾寒
覺來更漏殘

相見稀相憶久眉淺淡煙如柳垂翠幕結同心待郎熏
繡衾城上月白如雪蟬鬢美人愁絕宮樹暗鵲橋橫
玉籤初報明

背江樓臨海月城上角聲鳴咽堤柳動島煙昏兩行征
鴈分京口路歸帆渡正是芳菲欲度銀燭盡玉繩低
一聲村落雞

玉爐香紅蠟淚偏照畫堂秋思眉翠薄鬢雲殘夜長衾
枕寒梧桐樹三更雨不道離情正苦一葉葉一聲聲

空階滴到明

河瀆神

河上望叢祠廟前春雨來時楚山無限鳥飛遲蘭櫂空
傷別離何處杜鵑啼不歇豔紅開盡如血蟬鬢美人
愁絕百花芳草佳節

孤廟對寒潮西陵風雨瀟瀟謝娘惆悵倚蘭橈淚流玉
筍千條暮天愁聽思歸樂早梅香滿山郭回首兩情
蕭索離魂何處飄泊

銅鼓賽神來滿庭幡蓋裴回水村江浦過風雷楚山如
畫煙開離別艣聲空蕭索玉容惆悵妝薄青麥燕飛
落落卷簾愁對珠閣

河傳

江畔相喚曉妝鮮仙景箇女采蓮請君莫向那岸邊少
年好花新滿船紅袖搖曳逐風輕垂玉腕腸向柳絲
斷浦南歸浦北歸莫知晚來人已稀

湖上間望雨蕭蕭煙浦花橋路遙謝娘翠蛾愁不銷終

朝夢魂迷晚潮
蕩子天涯歸櫂遠春已晚
鶯語空腸斷
若耶溪溪水西柳堤不聞郎馬嘶

同伴相喚杏花稀
夢裏每愁依違仙客一去燕已飛不
歸淚痕空滿衣
天際雲鳥引情遠春已晚
煙靄渡南苑
雪梅香柳帶長小娘轉令人意傷

木蘭花

即春曉曲
集作古詩

家臨長信往來道
乳燕雙雙拂煙草
油壁車輕金犢肥
流蘇帳曉春雞早
籠中嬌鳥暖猶睡
簾外落花閑不

掃哀桃一樹近前池似惜容顏鏡中老

皇甫松十八首

竹枝

一名巴渝辭

檳榔花發

竹枝

鷓鴣啼

兒女

雄飛煙瘴

竹枝

雌亦飛

兒女

木棉花盡

竹枝

荔支垂

兒女

千花萬花

竹枝

待郎歸

兒女

芙蓉竝蒂

竹枝

一心連

兒女

花侵柵子

竹枝

眼應穿

兒女

筵中蠟燭

竹枝

淚珠紅

兒女

合歡桃核

竹枝

兩人同

兒女

斜江風起

竹枝

動橫波

兒女

劈開蓮子

竹枝

苦心多

兒女

山頭桃花

竹枝

谷底杏

女兒

兩花窈窕

竹枝

遙相映

女兒

摘得新

酌一卮須教玉笛吹錦筵紅蠟燭莫來遲繁紅一夜經風雨是空枝

摘得新枝枝葉葉春管弦蕪美酒最關人平生都得幾十度展香茵

采蓮子

菡萏香連十頃陂

舉

小姑貪戲采蓮遲

年

晚來弄水船

頭濕擢

擢

更脫紅裙裏鴨兒少年

船動湖光濫濫秋

擢

貪看年少信船流少年無端隔水拋

蓮子

擢

遙被人知半日羞少年

拋球樂

紅撥一聲飄輕裘墜越綃帶翻金孔雀香滿繡蜂腰少
少拋分數花枝正索饒

金蹙花球小真珠繡帶垂幾回衝蠟燭千度入香懷上
客終須醉觥盃且亂排

憶江南

蘭燼落屏上暗紅蕉閑夢江南梅熟日夜船吹笛雨蒲
蒲人語驛邊橋

樓上寢殘月下簾旌夢見秣陵惆悵事桃花柳絮滿江
城雙髻坐吹笙

天仙子

晴野鷺鷥飛一隻水渚花發秋江碧劉郎此日別天仙
登綺席淚珠滴十二晚峰青歷歷

躑躅花開紅照水
鷓鴣飛遶青山
背行人經歲始歸來
千萬里錯相倚
懊惱天仙應有以

怨回紇 二首

白首南朝女愁聽異域歌
收兵頡利國飲馬胡盧河
毳布腥膻久穹廬歲月多
雕窠城上宿吹笛淚滂沱
祖席駐征擢開帆候信潮
隔筵桃葉泣吹管杏花飄
船去鷗飛閣人歸塵上橋
別離惆悵淚江路濕紅蕉

司空圖

一首

酒泉子

買得杏花十載歸來方始坼
假山西畔藥闌東滿枝紅
旋開旋落旋成空
白髮多情人更惜黃昏把酒祝東風
且從容

韓偓

三首

生查子

侍女動妝奩故故驚人睡
那知本未眠背面偷垂淚
嬾卸鳳凰釵羞入鴛鴦被
時復見殘燈和煙墜金穗

浣溪沙

攏鬢新妝玉步搖。背燈初解繡裙腰。枕寒衾冷異香焦。
深院不關春寂寂。落花和雨夜迢迢。恨情殘醉却無聊。

宿醉離愁慢髻鬟。六銖衣薄惹輕寒。慵紅悶翠掩青鸞。
羅襪況兼金菡萏。雪肌仍是玉琅玕。骨香腰細更沉檀。

張曙

小字阿灰侍郎
律子詞一首

浣溪沙

枕障熏爐隔繡帷二年終日苦相思
杏花明月始應知
天上人間何處去
舊歡新夢覺來時
黃昏微雨畫簾垂


鍾輻

江南人咸通末以廣文生為蘇州院巡詞一首

卜算子慢

桃花院落煙重露寒寂寞禁煙晴晝
風拂珠簾還記去年時候惜春心不喜
閑窗繡倚屏山和衣睡覺醺醺暗

消殘酒 獨倚危闌久把玉筍偷彈黛蛾輕鬪一點相
思萬般自家甘受抽金釵欲買丹青手寫別來容顏寄
與使知人清瘦



御定全唐詩卷八百九十一

欽定四庫全書

集部

御定全唐詩卷八百九十二至
四

詳校官庶吉士臣何道沖

主事銜臣徐以坤覆勘

總校官知縣臣繆琪

校對官學正臣卜惟吉

謄錄監生臣許蔭培

欽定四庫全書

御定全唐詩卷八百九十二

韋莊

五十二首

訴衷情

燭燼香殘簾半卷
夢初驚
花欲謝
深夜月籠明
何處按歌聲
輕輕舞衣塵暗生
負春情

碧沼紅芳煙雨靜
倚蘭橈
垂玉佩
交帶嫋纖腰
鴛夢隔星橋
迢迢越羅香暗銷
墜花翹

天仙子

悵望前回夢裏期看花不語苦尋思
露桃宮裏小腰肢
眉眼細鬢雲垂惟有多情宋玉知

深夜歸來長酩酊扶入流蘇猶未醒
醺醺酒氣麝蘭和
驚睡覺笑呵呵長笑人生能幾何

蟾彩霜華夜不分天外鴻聲枕上聞
繡衾香冷嬾熏熏
人寂寂葉紛紛纔睡依前夢見君

夢覺雲屏依舊空杜鵑聲咽隔簾櫳
玉郎薄倖去無蹤

一日日恨重重淚界蓮顚兩線紅

金似衣裳玉似身眼如秋水鬢如雲霞羣月帔一羣羣
來洞口望煙分劉阮不歸春日曛

江城子

城一作神一名水晶簾

恩重嬌多情易傷漏更長解駕鴛朱脣未動先覺口脂
香緩揭繡衾抽皓腕移鳳枕枕檀郎

髻鬟狼藉黛眉長出蘭房別檀郎角聲嗚咽星斗漸微
茫露冷月殘人未起畱不住淚千行

定西番

挑盡金燈紅燼人灼灼漏遲遲未眠時斜倚銀屏無語
閒愁上翠眉悶殺梧桐殘雨滴相思

芳草叢生縷結花豔豔雨濛濛曉庭中塞遠久無音問
愁銷鏡裏紅紫燕黃鸝猶至恨何窮

思帝鄉

雲髻墜鳳釵垂髻墜釵垂無力枕函欹翡翠屏深月落
漏依依說盡人間天上兩心知

春日遊杏花吹滿頭陌上誰家年少足風流
妾擬將身嫁與一生休縱被無情棄不能羞

上行杯

芳草灞陵春岸柳煙深滿樓絃管一曲離聲腸寸斷

今日送君千萬紅縷玉盤金鏤盞須勸珍重意莫辭滿
白馬玉鞭金轡少年郎離別容易迢遞去程千萬里

惆悵異鄉雲水滿酌一杯勸和淚須愧珍重意莫辭醉
酒泉子

月落星沈樓上美人春睡綠雲歆金枕膩畫屏深
子規啼破相思夢曙色東方纔動柳煙輕花露重思難任

女冠子 二首

四月十七正是去年今日別君時忍淚佯低面含羞半
歛眉不知魂已斷空有夢相隨除却天邊月沒人知
昨夜夜半枕上分明夢見語多時依舊桃花面頻低柳
葉眉半羞還半喜欲去又依依覺來知是夢不勝悲

浣溪沙

清曉妝成寒食天
柳毬斜嫋間花鈿
卷簾直出畫堂前
指點牡丹初綻朵
日高猶自凭朱闌
含顰不語恨春殘

欲上鞦韆四體慵
擬交人送又心忪
畫堂簾幕月明風
此夜有情誰不極
隔牆梨雪又玲瓏
玉容憔悴惹微紅

惆悵夢餘山月斜
孤燈照壁背紅紗
小樓高閣謝娘家
暗想玉容何所似
一枝春雪凍梅花
滿身香霧簇朝朝

霞

綠樹藏鶯鶯正啼
柳絲斜拂白銅鞮
弄珠江上草萋萋
日暮飲歸何處客
繡鞍驄馬一聲嘶
滿身蘭麝醉如泥

泥

夜夜相思更漏殘
傷心明月凭闌干
想君思我錦衾寒
咫尺畫堂深似海
憶來惟把舊書看
幾時攜手入長安

歸國遙

春欲暮滿地落花紅帶雨惆悵玉籠鸚鵡單棲無伴侶
南望去程何許問花花不語早晚得同歸去恨無雙

翠羽

金翡翠為我南飛傳我意
畫橋邊春水幾年花下醉
別後只知相愧淚珠難遠寄
羅幕繡幃駕被舊歡如夢裏

春欲晚戲蝶遊蜂花爛漫
日落謝家池館柳絲金縷斷
睡覺綠鬟風亂畫屏雲雨散
閑倚博山長歎淚流霑

皓腕

菩薩蠻

紅樓別夜堪惆悵
香燈半卷流蘇帳
殘月出門時
美人
和淚辭
琵琶金翠羽
絃上黃鶯語
勸我早歸家
綠窗
人似花

人人盡說江南好
遊人只合江南老
春水碧於天
畫船
聽雨眠
壚邊人似月
皓腕凝雙雪
未老莫還鄉
還鄉
須斷腸

如今却憶江南樂當時年少春衫薄騎馬倚斜橋滿樓
紅袖招翠屏金屈曲醉入花叢宿此度見花枝白頭
誓不歸

勸君今夜須沈醉尊前莫話明朝事珍重主人酒深
情亦深須愁春漏短莫訴金杯滿遇酒且呵呵人生
能幾何

洛陽城裏春光好洛陽才子他鄉老柳暗魏王堤此時
心轉迷桃花春水淥水上鴛鴦浴凝恨對殘暉憶君

君不知

更漏子

鐘鼓寒樓閣。暝月照古桐。金井深院閉小庭空。落花香露紅。
煙柳重春霧。薄燈背水窗。高閣閑倚戶。暗熏衣。
待郎郎不歸。

謁金門

一名花自落一名垂楊碧一名出塞

春雨足。染就一溪新綠。柳外飛來雙羽玉。弄晴相對浴。
樓外翠簾高軸。倚遍闌干幾曲。雲淡水平煙樹簇。寸

心千里目

春漏促金燼暗挑殘燭一夜簾前風撼竹夢魂相斷續
有箇嬌饒如玉夜夜繡屏孤宿閑抱琵琶尋舊曲遠
山眉黛綠

空相憶無計得傳消息天上嫦娥人不識寄書何處覓
新睡覺來無力不忍把君書跡滿院落花春寂寂斷
腸芳草碧

清平樂

春愁南陌故國音書隔細雨霏霏梨花白燕拂畫簾金
額盡日相望王孫塵滿衣上淚痕誰向橋邊吹笛駐
馬西望銷魂

野花芳草寂寞關山道柳吐金絲鶯語早惆悵香閨暗
老羅帶悔結同心獨凭朱闌思深夢覺半牀斜月小
窗風觸鳴琴

何處遊女蜀國多雲雨雲解有情花解語寧地繡羅金
縷妝成不整金鈿含羞待月鞦韆住在綠槐陰裏門

臨春水橋邊

鶯啼殘月繡閣香燈滅門外馬嘶郎欲別正是落花時
節妝成不畫蛾眉含愁獨倚金扉去路香塵莫掃掃
即郎去歸遲

瑣窗春暮滿地梨花雨君不歸來情又去紅淚散霑金
縷夢魂飛斷煙波傷心不奈春何空把金針獨坐駕
鴛愁繡雙窠

綠楊春雨金線飄千縷花拆香枝黃鸝語玉勒雕鞍何

處 碧窗望斷燕鴻翠簾睡眼溟濛寶瑟誰家彈罷含
悲斜倚屏風

喜遷鶯

即鶴
冲天

人洶洶鼓鼙蓼襟袖五更風大羅天上月朦朧騎馬上
虛空 香滿衣雲滿路鸞鳳遶身飛舞霓旌絳節一羣
羣引見玉華君

街鼓動禁城開天上探人回鳳銜金榜出雲來平地一
聲雷 鶯已遷龍已化一夜滿城車馬家家樓上簇神

仙爭看鶴冲天

應天長

綠槐陰裏黃鶯語
深院無人春晝午
畫簾垂金鳳舞寂
寞繡屏香一炷
碧天雲無定處
空有夢魂來去
夜夜綠窗風雨
斷腸君信否

別來半歲音書絕
一寸離腸千萬結
難相見易相別
又是玉樓花似雪
暗相思無處說
惆悵夜來煙月
想得此時情切
淚霑紅袖黦

荷葉杯

絕代佳人難得傾國花下見無期一雙愁黛遠山眉不
忍更思惟閑掩翠屏金鳳殘夢羅幕畫堂空碧天無
路信難通惆悵舊房櫳

記得那年花下深夜初識謝娘時水堂西面畫簾垂攜
手暗相期惆悵曉鶯殘月相別從此隔音塵如今俱
是異鄉人相見更無因

河傳

何處煙雨隋堤春暮柳色蔥蘢畫橈金縷翠旗高颭香
風水光融青娥殿脚春妝媚輕雲裏綽約司花妓江
都宮闕清淮月映迷樓古今愁

春晚風暖錦城花滿狂殺遊人玉鞭金勒尋勝馳驟輕
塵惜良辰翠蛾爭勸臨邛酒纖纖手拂面垂絲柳歸
時煙裏鐘鼓正是黃昏暗銷魂

錦浦春女繡衣金縷霧薄雲輕花深柳暗時節正是清
明雨初晴玉鞭魂斷煙霞路鶯鶯語一望巫山雨香

塵隱映遙望翠檻紅樓黛眉愁

怨王孫

與河傳月照梨花二詞同調

錦里蠶市滿街珠翠千萬紅妝玉蟬金雀寶髻花簇鳴
璫繡衣長日斜歸去人難見青樓遠隊隊行雲散不
知今夜何處深鎖蘭房隔仙鄉

木蘭花

獨上小樓春欲暮愁望玉關芳草路消息斷不逢人却
歛細眉歸繡戶坐看落花空歎息羅袂溼班紅淚滴

千山萬水不曾行
魂夢欲教何處覓

小重山

一閉昭陽春又春
夜寒宮漏永
夢君恩
臥思陳事暗消魂
羅衣濕紅袂
有啼痕
歌吹隔重閣
遶庭芳草綠
倚長門
萬般惆悵向誰論
凝情立
宮殿欲黃昏

望遠行

欲別無言倚畫屏
含恨暗傷情
謝家庭樹錦雞鳴
殘月落邊城
人欲別
馬頻嘶
綠槐千里長堤出
門芳草路

萋萋雲雨別來易東西不忍別君後却入舊香閨

牛嶠 二十七首

憶江南

銜泥燕飛到畫堂前占得杏梁安穩處體輕惟有主人
憐堪羨好因緣

紅繡被兩兩間鴛鴦不是鳥中偏愛爾為緣交頸睡南
塘全勝薄情郎

西溪子

捍撥雙盤金鳳蟬
鬢玉釵搖動畫堂前
人不語弦解語
彈到昭君怨處
翠蛾愁不擡頭

江城子

鷓鴣飛起郡城東
碧江空半灘風
越王宮殿蘋葉藕花
中
簾卷水樓魚浪起
千片雪雨濛濛

極浦煙消水鳥飛
離筵分手時
送金卮渡口楊花狂雪
任風吹日暮空江波浪急
芳草岸柳如絲

定西番

紫塞月明千里金甲冷戍樓寒夢長安鄉思望中天
閣漏殘星亦殘畫角數聲鳴咽雪漫漫

望江怨

東風急惜別花時手頻執羅幃愁獨入馬嘶殘雨春
蕪溼倚門立寄語薄情郎粉香和淚泣

女冠子

四首

綠雲高髻點翠勻紅時世月如眉淺笑含雙靨低聲唱
小詞眼看惟恐化魂蕩欲相隨玉趾回嬌步步約佳期

錦江煙水卓女燒春濃美小檀霞繡帶芙蓉帳金釵芍
藥花額黃侵膩髮臂釧透紅紗柳暗鶯啼處認郎家
星冠霞帔住在藥珠宮裏佩丁當明翠搖蟬翼纖珪理
宿妝醺壇春晝綠藥院杏花香青鳥傳心事寄劉郎
雙飛雙舞春晝後園鶯語卷羅幃錦字書封了銀河雁
過遲鴛鴦排寶帳豆蔻繡連枝不語勻珠淚落花時

酒泉子

記得去年煙暖杏園花正發雪飄香江草綠柳絲長

鈿車纖手卷簾望眉學春山樣鳳釵低嫋翠鬟上落梅
妝

菩薩蠻

舞裙香暖金泥鳳畫梁語燕驚殘夢門外柳花飛玉郎
猶未歸 愁勻紅粉淚眉翦春山翠何處是遼陽錦屏
春晝長

柳花飛處鶯聲急晴街春色香車立金鳳小簾開臉波
和恨來 今宵求夢想難到青樓上贏得一場愁鴛衾

誰竝頭

玉釵風動春幡急
交枝紅杏籠煙泣
樓上望卿卿
窗寒新雨晴
熏爐蒙翠被
繡帳鴛鴦睡
何處有相知
羨他初畫眉

畫屏重疊巫陽翠
楚神尚有行雲意
朝暮幾般心
向他情謾深
風流今古隔
虛作瞿塘客
山月照山花
夢回燈影斜

風簾燕舞鶯啼柳
妝臺約鬢低纖手
釵重髻盤珊
一枝

紅牡丹 門前行樂客白馬嘶春色故故墜金鞭回頭
應眼穿

綠雲鬢上飛金雀愁眉斂翠春煙薄香閣掩芙蓉畫屏
山幾重 窗寒天欲曙猶結同心苴啼粉浣羅衣問郎
何日歸

玉爐冰簟鴛鴦錦粉融香汗流山枕簾外轆轤聲斂眉
含笑驚 柳陰煙漠漠低鬢蟬釵落須作一生拌盡君
今日歡

更漏子

星漸稀漏頻轉何處輪臺聲怨香閣掩杏花紅月明楊
柳風挑錦字記情事惟願兩心相似收淚語背燈眠
玉釵橫枕邊

春夜闌更漏促金燼暗挑殘燭驚夢斷錦屏深兩鄉明
月心閨草碧望歸客還是不知消息孤負我悔憐君
告天天不聞

南浦情紅粉淚爭奈兩人深意低翠黛卷征衣馬嘶霜

葉飛 招手別寸腸結還是去年時節書託鴈夢歸家
覺來江月斜

感恩多

兩條紅粉淚多少香閨意彊攀桃李枝歛愁眉 陌上
鶯啼蜨舞柳花飛柳花飛願得郎心憶家還早歸

自從南浦別愁見丁香結近來情轉深憶鴛衾 幾度
將書託煙雁淚盈襟淚盈襟禮月求天願君知我心

應天長

玉樓春望晴煙滅舞衫斜卷金條脫黃鸝嬌轉聲初歇
杏花飄盡龍山雪鳳釵低赴節筵上王孫愁絕鴛鴦
對銜羅結兩情深夜月

雙眉澹薄藏心事清夜背燈嬌又醉玉釵橫山枕膩寶
帳鴛鴦春睡美別經時無限意虛道相思憔悴莫信
綵牋書裏賺人腸斷字

木蘭花

春入橫塘搖淺浪花落小園空惆悵此情誰信為狂夫

恨翠愁紅流枕上
小玉窗前嗔燕語
紅淚滴穿金線
縷雁歸不見
報郎歸
織成錦字
封過與

御定全唐詩卷八百九十二